

四庫全書

集部

欽定四庫全書

集部

燕石集

目錄
卷一至
四

詳校官編修_臣曹錫齡

中書_臣劉源溥覆勘

覆校官編修_臣吳壽昌

校對官學正_臣卜維吉

謄錄監生_臣劉本立

欽定四庫全書

集部五

燕石集

別集類四元

提要

臣等謹案燕石集十五卷元宋聚撰聚字顯夫大都人泰定元年進士歷官翰林直學士兼經筵講官謚文清聚博覽羣籍與兄本後先入館閣並有集行世時人以大宋小宋擬之聚集為其侄太常奉禮郎擴所編凡詩十

卷文五卷首載至正八年御史臺咨浙江行
中書省刊行咨呈一道歐陽元蘇天爵許有
壬呂思誠危素五序末附謚議墓誌祭文輓
詩又有洪武中何之權呂熒二跋蓋猶舊本
歐陽元序稱其詩務去陳言燕人凌雲不羈
之氣慷慨赴節之音一轉而為清新秀偉蘇
天爵序稱其詩清新飄逸間出奇古若盧仝
李賀危素序則稱其精深幽麗而長於諷諭

核其所說亦約畧近之至其詞藻煥發時患
才多句或不檢韻或牽綴如正獻公墳所寒
食詩有高墳白打錢白紫韋莊詩上相閒分
白打錢非紙錢也張女輓詩却是真魂埋不
得句序稱其女工於屬對十歲而夭紫李商
隱詩萬古貞魂倚暮霞非十歲未字之女也
如斯之類大抵富贍之過貪多務得遂不能
刮垢磨光然武庫之兵利鈍互陳論其大體

足為一家固不以字句累之矣其文為作詩之餘事然溫潤而潔淨亦不失體裁焉乾隆四十二年三月恭校上

總纂官

臣紀昀
臣陸錫熊
臣孫士毅

總校

官

臣

陸費墀

欽定四庫全書

集部五

燕石集目錄

別集類四
元

卷一

古賦 三首

古詩 四言 一首

卷二

古詩 五言 二十八首

卷三

古詩

七言

二十二首

卷四

雜詩

五首

古樂府

五十首

卷五

律詩

五言

六十八首

絕句

五言

十五首

卷六

律詩 七言 六十五首

卷七

律詩 七言 八十九首

卷八

絕句 七言 一百六十二首

卷九

絕句 七言 一百七十二首

卷十

絕句

六言

十首

近體樂府

四十首

卷十一

表

七首

上梁文

一首

祝文

三十三首

卷十二

記

十首

序 九首

卷十三

雜著 十二首

祭文 六首

卷十四

碑誌 十二首

卷十五

行狀 一首

傳 三首

跋 十首

燕石集原序

漢初詩學方興燕人韓嬰作外傳數萬言史稱其言與齊魯殊又言嬰嘗傳易燕趙間人喜詩故詩傳而易微余讀是有以知燕之為詩蓋千有餘年於此外傳言奇詭卓犖而詩之為教本乎山川之風氣人物之性情者也燕東並遼海通蓬萊西北控并塞自昭王好神仙往往招致畸人方士於其國至若豪俠則易水之歌漸離之筑楚漢間安期生蒯通兩人者則又嘗合二者之奇

為一矣其風聲氣習歲月之鬱湮世故之感發不激為
變宮變徵之流則溢出為騷雅歌行之盛一氣機之宣
流耳翰林薊門宋君顯夫眡予詩若干首余讀盡卷求
一言之陳無有也雖大堤之謠出塞之曲時或馳騁乎
江文通劉越石諸賢之間而燕人凌雲不羈之氣慷慨
赴節之音一轉而為清新秀偉之作吾知齊魯老生之
不能及是也奈何猶以燕石自名其集耶顯夫年強仕
所作當日富所造詣未易窺姑序余所睹記如是云至

正元年三月丙子奉政大夫藝文少監長沙歐陽玄
序

延祐中朝廷大興文治予友宋顯夫從其兄誠夫自江
南始還莫識其面而大小宋之名隱然傳播於京都未
幾誠夫果魁多士久之顯夫亦賜同進士出身初顯夫
兄弟從親官遊於江漢之間日益貧窶衣食時或不充
故其為學精深堅苦下至裨官傳記亦無不覽詩尤清
新飄逸間出奇古若盧仝李賀之流益喜其詞以模擬

之及聞貢舉詔下始習經義策問既擢第遂入館閣為校書編修修撰待制又嘗為太禧掌故中臺御史山南僉憲最後由國子司業入翰林為直學士至正丙戌之春年五十三以卒諡曰文清誠夫累官至禮部尚書國子祭酒諡曰正獻始者誠夫之卒顯夫屬予序其文後令顯夫之亡其子國子生籲復彙其稿徵序於予夫宋氏文學之偉固不待予言而傳也第念伯仲方以才能進用不極其至相繼而逝此中外有識之士重悼惜也

昔者仁皇開設貢舉本以敷求賢才作興治化今觀累
舉得人之盛或才識所長裨益國政或文章之工黼黻
皇猷議者不得盡以迂疎異懦詆訾之也嗚呼去古雖
遠士之卓然能有所見毅然能有所守又豈無其人哉
彼或詆之利害視之以禍福事弗合義言不中度詭隨
而或不能盡識也予以交遊之久故深知之知之深則
哀之也切是則國家昇平百年德澤涵濡而庠序樂育
多士之功豈第求其文章言語之工而已顯夫家本京

師故題其集曰燕石云至正六年冬十月朔集賢侍講
學士通奉大夫兼國子祭酒趙郡蘇天爵序

予卧病田廬有禁近之擢迫命就道惶汗無措而復竊
自喜幸故人宋君顯夫實直學士協恭侍從自公論文
亦一樂也比予入京前十五日而顯夫卒矣予病亟歸
不得省其孤承詔復來顯夫已贈國子祭酒謚文清思
而不可見惜哉孤籲奉燕石集拜泣且曰此先子所遺
兄彙編次者也世父至治集公實序之敢援例以請予

序誠夫文不一紀又序其弟人之生世其可悲也夫昔
顯夫兄弟入京首與予遊盡賦予所著睽離有作必寄
故知其長蚤且悉也及閱顯夫稿則未相識時歌詩已
嘗及予重以三十年分誼之篤可辭乎國家設貢舉陶
天下以經術餘三十年矣文當日昌而名能著見者何
其指之不多屈也積儲之不厚也造詣之不遠也取而
隨竭發而自耗拘拘規倣而俚俚乎所適者欲昌得乎
惟具有所本也有所參也該洽沈潛心有所得濟以定

力而熟之則於文也決淵渟而灌溝澮策堅良而走康
 莊庶乎其達矣顯夫登甲子科考其作未有貢舉前已
 汨汨矣眊誘利祿而重失得忽於播而急於獲者不有
 間乎人知其才而不究其積儲造詣之有素也故予序
 其集而原其得俾後之觀者有激焉集凡若干卷文若
 千首詩樂府若干首自名燕石然世皆信其為玉也璠由奉
 禮郎為丞相東曹掾彙從父之文不使遺逸不媿顯夫
 之猶子矣顓甫襄事即謀刻父文宋之後其益昌矣哉

至正六年歲在丙戌冬十一月既望翰林學士承旨榮
祿大夫知制誥兼修國史知經筵事安陽許有壬序

欽定四庫全書

燕石集卷一

元 宋聚撰

古賦

勗志賦

延祐己未

伊我生之肇始兮荷陶埴於元鈞稟粹質為乾道兮值
中夏之昌辰靈賦余以淑德兮烏敢昧於持循承啟迪
於兄考兮懼速戾而恒厘矧干戈未耜之勞兮曾少逮
於吾身苟怠棄於服行兮奚古訓之可親悵中經於韞

竇兮胡筆舌之能矢粵吾降於靈均之故家兮氓泰擴
而俗鄙逮巡波而東逝兮厓弭節乎南紀何通都大邦
之不能一窺兮獲請業於鉅夫與夫名士守窮廬而矻
矻兮財甘蠹之可齒戀嫪蔕枕乎經史兮邈疇探其源
委慨歲年之不吾予兮顧總角之深悔力不已於大猷
兮庶免夫自畫之恥荃不察夫余衷兮謂盛時之可仕
仰學優之明訓兮患何能而立位抑巖廊之名器兮詎
倂躋之可覲慙次且而求人兮畏干祿之譏訾將貞素

之全天兮保父書而卒歲委流行於坎止兮順大命之
所俾及神聖之當宁兮闡斯文乎明昌軼前王之大比
兮攷德藝而登揚蕭艾摧殄兮蕙蓀菊芳鸞鳳騫翥兮
鷗鵠不翔羣龍滿朝兮罽羅畢張余惟幸際此休期兮
願踵武於髦英雖青雲之不可以力致兮我父闕之疾
徐然逐禽而充庖兮審徒搏之焉如南園積年丘山兮
亦壑菑之力也騁羈絆於天衢兮在駕駘之習也甘賤
貧於有道之世兮匪君子之德也亶進修之不釋兮茲

人爵之得也豈上求之不篤兮內省以何而應旃紛蛾
眉之競進兮妾獨後夫嬋媛或謂予之銜技求售兮惜
余致身之頗偏曰慎言行俟夫旌幣兮在仰希乎聖賢
遂陳詞以復之兮若獨未徵夫往古途雖殊而歸則同
兮均貴乎濟時而匡主余忱不足以爲則兮豈前修由
之而亦悞彼岐蹊捷徑固可醜兮胡不遵此先路縱得
喪之少拂兮敢他人之是怒惟敬書而究道兮誠夫死
而弗錯亂曰貴與富兮漠浮雲兮上窺陶虞致我君兮

年與時馳惜寸分兮彼蒼孔昭斯志信兮

溜翠石賦

有序

濟南張公子惟健得靈壁石方而厚兩峯相連右高而左不及中微斷不絕腹背有凹痕修以直若泉溜致然者云類其鄉鵲山製名溜翠石曰示余且徵賦賦曰

圓穹孕靈品彙賦形有萬不同怪狀異名寓至道於隱
贖供撫玩於高明爰即物而究理詎役志而娛情繁珍
禽與瑰葩恒被寵而叨榮矧茲石之有取宜公子之見
稱其始也山英會神元氣聚精澗谷獻瑞巖穴奏禎挺

一拳之瑰特結千歲之堅貞潤含雨雲幽入杳冥黝暈
蒼容鐵質金聲澹煙霏之紆拂絕文蘚之滋生細逕直
痕嵌翠凹青殆寒泉之引脉積歲月而滌成恍顏牆之
屹立溜銀竹之勻傾右聳左隕面古背平擬蓮峰底柱
之危鄙蔓壑枝峯之縈竦然若鉅人元夫之襟度凜然
若直臣烈士之儀刑方鵲山而具體於凝雲而友朋
一石號宜其承以文木錫以華號而叅諸筆硯之盟彼
凝雲平泉誓子米狂呼兄為尤物之所感又何免夫君子之

譏評也邪乃有塵表逸人守素養和即絃誦之宴閒撫
玉立之嵯峨挹松風於清晝援綠綺於庭阿摠情繹思
而為溜翠之歌歌曰欽崙峭拔石之質兮凝神正體石
之德兮伊人剛方與石匹兮敬壽公子服之無數兮

陽燧賦

周禮司烜氏掌以夫燧取明火於日注云夫
燧陽燧也取日之火欲得絜氣明燭以照陳
饌

神聖制禮厥氣具張爰備典秩爰著彛章品類實繁有

燧曰陽載鎔載範孔瑩且彰至明比德於水鑒至圓儷
則於穹蒼湛兮若清水之凝於元冥皎兮若太陰之臨
於素商靡氛垢之污染之塵翳之蔽障慨流傳之有自
豈鼓鑄之無方匪稽古之髦士奚制度之能詳及乎燔
柴於圓丘薦裸於明堂大禮將歲明禋是享天高日晶
霧闢雲藏烜氏敬蒞其職業秋卿祇奉其故常持時質
以承絜氣對景曜以受烈光以明照明感天象於高遠
以陽求陽索火德於渺茫倏始焉而耿耿遽愈熾而煌

煌所以灼庭燎於墀陛所以熬墳燭於壇場交輝於簋
簋豆籩之位布焰於牲酒珪幣之行由禮器之妙用昭
祀典之齋莊抑嘗謂火之為象近著於世擊石匪妄鑽
木甚易叩門而無弗與束蘊可以立致燧之為物人所
裁製以金之材受火之制仰列陰體俯翕陽氣然而聖
人必遠求於天而近捨諸地於以見致潔清而敬明神
又以見五行之奧理及神聖創物之上智至若燧人之
鑽童子之佩其義雖同而其形又異也嗚呼觀物可以

省身窮理而後知至炯然方寸虛靈不昧推善端而擴
充自微燭而昭晰是則明明之靈臺又乃吾身之陽燧

古詩

四言

座主學士虞先生眉菴詩

厥初生人感善孕靈竅骸膚髮各踐乃形曰睹曰聞克
持克履効職爾勞不具爾恥唯眉于面既崇且優明明
容觀疎爽潔脩頰瞰羣役靡愆靡

闕

矧不羸于壯耄亦

靡

闕

捐舒泰者喜

闕

憂形則

闕

曠無矯無俞表

裡天君闕世貴適用我罔或違之有忽於茲我莫敢與
之允矣君子顧諟斯義小子詩之式告執事

燕石集卷一

欽定四庫全書

燕石集卷二

元 宋聚 撰

古詩

五言

日出齊化門

都城東出南頭第一門

日出齊化門騰騰開九光
四面啟金鑰崇扉闢輝煌
都城萬井烟沃盥整衣裳
納履戒車馬出入紛倉皇
士者趨名譽魚佩鏘琳瑯
鄙夫競錐刀蟻子羅康莊
大明忽西顧所遇皆不常
敗事頭搶地得志驕昂昂
擾攘千萬

情四序恒茫茫

關

馭天風弭節白雲鄉左驂碧虹蜺

右駕紫鳳皇俯視塵土海靈臺
悲傷誓將九轉丹投之療膏育
魏魏金銀宮境界殊清涼凡骨
倘有緣握手同徜徉

送魏通甫南歸

魏君江海儒孟浪遊天都天都
產功名豪俠爭奔趨子雲老太
玄紫綬金張紆吾儕赤手來抱
藝將何如時無解貂人太白悲
窮途晨炊待桂玉惡況那能祛
涼風西

北來塵埃與之俱秋清氣冱瑟愁悲塞中區駕言欲南
還感激仍躊躇豈不願君留潛珍俟須臾江南垂白親
日夕恒倚閭袖中出毛檄入室聊歡娛斗食勿羞薄再
舉冲天衢

雪寒書事廿六韻

延祐己未在樂亭縣作

幽雲敷曾霄狂吹趣陰霰氛霾互黯黹雨雪事交戰彌
空始糝屑降地旋削片斯須萬彙失頃刻九有遍霏霏
集頽堞皜皜被遐甸危峰冒周圭廣陌曳齊練崇陵受

委積枯枿容挂胃况縞未足多擬絮差可善通達駭連
璐塊壤訝垂填階平惡漫沒谷

闕

煩褰箔

燭幌助披卷氣清華蓋爽光爛銀海眩太素靡污垢至
撲謝瑯瑤人蹤絕往反野色一更變積陰若膠轄祁寒
病增羨晨衣襲狐貉夜席益莞薦衾重初昏寢薪濕停
午膳嚴威折續綿凍壘裂盡顛髮森憚去笠指直愁結
褥凌堅菜蕪金漸瑩歛溪硯羈人畜怨憾狩將坐畏悞
虎士跼趾瘝馬走牙齒顛罷忙歸禁痒陋邑矧饑荐屋

潤僅自侈室匱疇與言窮荒覲吹律凝沍需見覲揮翰
書自繁敢以古雅銜

送項鍊師還天台

海岸山岩堯飛霞凌紫霄中棲鍊形子綠髮顏不凋漆
點雙瞳人神授養生訣暮乘赤城風晨謁玉京闕振迅
鶴氅淨翱翔鳬舄輕金丹自愛惜綠酒陶性情我慚塵
土姿解后方外友忘形時一見談屑紛在口今朝聞還
山惜別令人嗟相思欲相見難訪碧桃花

松濤齋

華省樹颼颼繁聲發中宵詎非漆園籟謂是廣陵潮羽
葆蕩流月鳳吹激商飈永言託棲息聽此滌煩囂

中秋陪謝敬德修撰達兼善典籤誠夫兄學士
會飲周子嘉如舟亭交命險韻十二依次詩
得賞字

秋川澄苒藻涼樾墜栗橡雅集融酒尊緩步阮屐綈華
構故依岸危欄欲飄飄夕齋滌煩囂時清侈歡賞寒光

揭寶鑑灝氣凝銅掌翔翽仙蛻骨鼓舞兒釋襁初窺祇
開軒久眺還倚杖林鳥驚倦翼莎蒼薦哀響緬懷谷之
盤未卜川若輞典籤雄朔客太史詫川黨交觥罰如讐
探策心遽駟主人畫舫齋坐客龍虎榜

羣玉司崔元方琅然亭

幽人虛白室理琴恒自怡聲兼碧玉調弦是水晶絲涼
颺動脩樾皓月涵清池至音一八耳四座無邪思

送李溉之得請還濟南

髻鬢客江漢早聞高士名君居玉沙縣我在渚宮城弱
小知慕君不得覲君面道路播詞章庸俗矜俊彥騏驥
厭庭戶鸞鳳悲草萊英標出世表去去黃金臺風塵綺
陌深烟霧玉堂宵浩歌香爐峰巢雲寄木杪朝辭九華
頂暮宿黃鶴樓綸巾紫鳳褐欲去仍或留竭來重翱翔
五十霜鬢秋瀛洲列羣仙蓬山擷蘭芷一登鑾坡峻再
陟阿閣崇牙符雜珂佩通籍金闕中謁帝興聖宮迴車
歷城道矯首凌天風振衣下瑤島東望華不注烟霞齊

魯郊言歸理松楸嘯傲依堂坳緬想共君遊不得恒聚
首叩首屢投刺塵鞅阻文酒雨濯野山色晴飛溪柳花
明發遂長往憐君離思賒雲漢耀奎文長庚麗其下天
書行召還豈是栖栖者

濟州李氏一門娣姒四人貞節

玉樹摧秋霜總帳悲夜涼松柏爭厲操蘭蕙俱流芳悽

楚僅一子儀刑自見亡共嗟怨毒苦不知年命長

李氏
昆弟

五人溫良敬讓皆未及二十
歲卒俱無子惟茂一子今存

和王師魯哭子詩廿七韻

我識王內翰早歲賦美質筮仕困州縣處友固膠漆
擣辭若纂組粲爛錦城匹福善宜裕後酬勞當任逸蒼天
不可問得子旋傷失君懷未能慰我恨亦云積益春喪
孩女仍唁僕與姪阿申姪之子併官奴兩兒衆所惜方期
及髫鬢入學相誘掖亭亭芝芳妍溫溫玉纈栗隨行操
几杖或可弄文筆一以世科第一以嗣臧獲云胡俱夭
折相去不百日孩女不甚痛長不恃其力初疾忍輒棄

命醫恒接迹終焉莫救藥枉負不慈責娟娟競秀奩眉
目猶在覲傷心擲綳祿塵泥污紅碧父哀猶強飯母悼
不安席適值呂太史為我亦傍泣渠子歲三喪鵲雛勞
卵翼尤嗟中殤女締繡已能刺吾兒幸存二懷抱若可
釋疲劣不好學稍令誦內則君誠曠達士悲淚莫頻滴
禱神名山顛

都人以歲月祈嗣于盧師山

置妾居側室佇作湯餅會

人醉酒一石

送張孟功揚州覲省分題得遊絲

東郭暢景韶飛絲蕩晴朝細逐柳綿度狂隨薰風飄燕
郊索去策楚岸冒征橈嗟予顧不及相送共迢遙

江陽毛定甫天光雲影閣

伊人結小隱鑿沼若一鏡澄波涵至明穹昊入俯映初
緣適幽情乃謂契善性考亭或神遊可讓不可競

江東胡士恭嘉樹軒

野人愛嘉樹題作幽軒名顧豈樗櫟散願懷松柏貞深
沈永夏景蕭颯繁秋聲紛紛事遊冶嘖嘖爭春榮

王君冕關中別墅芳潤亭寄題二十韻

雍壤第上上土厚風氣溫水泉引甘澤卉木滋以蕃興
王作都會山川鬱屏藩維周秦漢唐陳蹟猶具存一覽
以娛目矧此長子孫勝境遇名士相值復何言王君長
安人員郭有田園藍田在其左終南高且尊平川豁瞻
眺崇岡如吐吞結構事幽隱池臺闕重垣植木春茂茂
醺酒夏沄沄音渾晴花炫屋角秋苔黯牆根嵐翠浥圖籍
柯葉蔭壺尊觴咏協時序起居適寒暄生產付子弟供

具有難豚好客時過從租吏不叩門談評極宇宙息偃
度朝昏緬懷鶴在陰大笑虱處禪茫然珪組念邈矣車
馬喧茲亭可適意餘事勿復論

君冕為三原縣令嘗被誣未雪

早發安平

錄囚襄陽

露華沐脩叢涼思浩可掬陽光炫遙川熱念洵相續駕
言省民瘼行行涉巖谷訥訥紛聽訟疊疊厓問俗傷哉
無知氓誤向憲網觸伏辜痛呼蒼冤者說拳拮于時嗟
稍旱禾黍未豐緝媿無雨隨車潤澤溥川陸皇靈赫臨

照恒負伐檀慝雖非于公仁敢效俊臣酷

山北憲僉丁文苑挽詩

乙卯科哈必齊也

使君氣凌雲學劍喜論文生材拔其萃立事張吾軍奕

葉擢高第甘棠蔭孤墳九京不可作頑懦徒紛紜

乃子慕嵩

登癸酉科文苑嘗憲
浙西遂葬西湖之側

送太原房淳德赴上長蘆校官廿四韻

曩歲在甲子我忝登桂籍君從河東來劇壘肆健筆相
識稠人中神勝鬚髮黑河汾孕靈秀翛然澗松柏文章

豈優劣方畧判得失時運或少乖戰藝不幸北乾龍飛
九五湛恩逮點額受職固匪輕笑捧告身勅音問久寥
邈再遇京塵陌或薦諸太常借徑簿領役禮文熟討論
固豈刀筆術驤司巍學宮儼在漳水側橫經屬老成弟
子拜講席廣文莫厭冷師道貴名實官業墮素餐吾黨
有媿色育材登廷珍計功倍千百桴舟載妻子攜書去
王國別酒借顏紅春衣點頭白尚憶韓與許當時同少
訕士宗掾柏臺才氣森萃律輝卿莎塞下幕府著勞績

小大無棄捐朝家禮羅密賢路關榛蕪異才應間出文
運豈偶然因君重太息

蘇伯脩湖廣行省叅政分題賦詩送行得洞庭
波

秋風木葉下送目人千里洶湧趨東陵滴蕩混南紀天
垂俱沈浮霜落迺清泚蛟龍怒未平舟楫漫難理蒼梧
雲氣連笙竹磯石磊所恨礙君山仍嗟愁帝子予懷渺
不極客思浩然起願令沅湘波安流入江水

禮部侍郎台哈布哈兼善出守會稽分題送行得

讀書堆

昔賢居海陬幽潛有遺址簡編不復存培塿尚堪指三
年不窺園西京稱董子蓬蒿繞宅生仲蔚號高士為學
貴處靜業成尚致理用行舍則藏訓詁殆卑猥黃門任
大同朱墨訂文字雖非注魚鰕乃爾彙虎豕夫君系貴
族綴緝淞江涖弱冠登巍科禁省久歷履今此乃作守
出處將肖彼掉策國東行去志疾若矢南州欲訪古不

憚紆道里遙知郡政暇閉閣究經史仕學能兩優豈直

野王止來慕子所歌亦復懦可起

堆梁黃門侍郎魚太學博士顧野王讀書

之所在嘉興之海鹽即今實雲寺是也分題得此非魚善所經由之道殆有所謂邪元約賦五言古詩十韻今多六韻詞不能已也魚善至治辛酉科狀元幼從天周本心學野王撰玉篇若干卷

草蟲圖

蝗螽斯螳螂蟋蟀圖國子生求跋

羣蟲居草間翾動各有趣或為人所憐或為人所惡憐惡我豈偏彼乃自致然披圖付一哂不足汨吾天

送高麗進士李仁復東分題得箕子廟

皇矣錫疇衍已焉鼓琴悲列封出異代主教開東陸道
義三仁稱德澤萬世思遺像儼珪袞魏宮肅遵彝頻臨
憤溝瀋奔走高句驪宇宙相終窮肝蠻無已時之子誦
經籍賓興膺爵縻龍光粲冠裳鹿鳴奏謠詩睠此承帝
恩實由文化施歸與下車拜報稱恒念茲

題道者山

多爾濟國王

元氣肇融結律元蟠厚坤蓬瀛詫虛無五嶽名號尊茲
山介平營特與太古存碣石拱其側水巖何足論東北

醫巫閭羅列為弟昆境迴稱瞻眺多景移晨昏烟霏雜
草樹海氣時吐吞幽深閼靈怪勝麗難具言謂宜棲隱
淪秋鶴仍春猿叢桂賦騷雅蘿薜相嬋媛顧此緇衣流
結構開祗園陳迹紛惚恍紀載探本原屬問賢侯王遊
觀駐朱軒從行樂觴咏風日搖旌旛我昔延祐末東邁
窺其藩望望不得登予懷未能諉於時秋雨霽仰羨思
攀援誰為持此意灑翰題空門

送多爾濟班監憲淮東分題賦詩得豐樂亭

豐山既足玩豐歲仍可喜太守為築亭日日飲滁水幽
谷環軒楹泉石列階記藹藹禾稼盛皞皞風俗媿政平
共觴咏民安事田里擣辭述佳致行樂遺舊址使君出
貴裔讀書精治理帝命徂淮南持節長風紀是州處行
部西望才尺咫今茲罹旱暵郡邑多苦餒衣食并去聲賴
賢明庶免溝壑死先去聲憂回天心相業由此始

送王德常南臺御史分題賦詩得朱雀橋

秣陵古都會秦淮實壯哉長波護巨鎮危橋橫曲隈華

桁何偉麗赤闌亦縈迴世稱題柱石人是濟川才泛鷁

堪屢往乘驄經幾回當時王謝宅燕子喜重來

德常由國子生

牢雄之歸信辟掾南行臺繼為
勾管今復拜御史凡三往焉

滎陽趙孝子

名壁字君璋

孝乃百行本親有罔極恩親恩何以報持報百身論事
生或能盡事亡鮮如存趙君性誠篤能窺曾閔藩親瘠
拜醫師既葬廬墓垣身與木石居淚零松柏原動息撫
遺體哀痛傷心竟讀禮已無媿抱恨終弗諉過車式而

敬朝命表宅門大哉永錫類澆風庶能敦

節婦劉氏

劉氏陽曲民家女早嫁西杜王舜卿生子甫一歲王遠遊越十年不歸劉

氏奉舅姑惟謹無怨言子年十四聞父留灤京往拜焉至則他娶矣劉若不聞日勉其子以學又十年王始歸決日而復去竟死灤水上劉自奮艱厄中以保其家以成其子有司上其事旌其門子名思義劉年七十餘

生世苦不諧愈甚太常屬藁礎任飄蕩寧馨堪撫育生無織錦詩死有崩城哭愁雲散晉溪華表照陽曲

送汪臣良編修出知餘姚州題得石鼓

繫昔中

去聲

興王振武岐陽蒐臣工作歌詩紀蹟庸闡幽

琢石制為鼓深刻將垂休渾堅不少磷文字粲以周古
拙出史籀蟠錯紛蛟虬氈駝護轉徙逮閱三千年朝
尤寶惜移寘宮牆陬棲息得所託珍祕價莫疇刺史瑚
璉器出守趨東甌敦樸且貴重華采殆罕儔旌麾暫補
外廊廟行見收亦若此鼓然置之崑崙丘

胡震亨家慶堂

三釜及其慶庭闈有餘歡易貴不家食祿養心始安東

隣供滄瀨西人盛盤飮酒旨餽亦嘉素身興永歎君子
奮逢掖牙緋效王官作堂娛二親上壽羅芝蘭養志既
可尚揚名良獨難錫類動里閭美譽期不刊

燕石集卷二

欽定四庫全書

燕石集卷三

元 宋聚 撰

古詩 七言

涼夜吟 十五歲作

雲頭金玦秋意生城南啼鳥三四聲
溽溽斜露銅鋪濕闌下幽花香氣清
倡樓迢遞咽凝管波底老龍求子鳴
蕭蕭竹樹小山雨驚覺佳人夢中語
濕螢寥落階莎寒拂拭桃笙掩閨戶

朝元宮白牡丹

延祐丙辰在汴作

瑤圃廓落崑崙高霓旌豹節凌旋颿東門偷種來塵囂
開雲鏤月百千瓣雪痕冰壘辭鏤琬重臺複榭玉版白
濕露擁出青霞嬌瓊娥愛春受春足香腴酥膩愁風消
人間洛陽紅紫妖紫霞灑灑吹秦簫青鸞望極何當招

岳陽樓

熱雲滂滂東風死東方春來著蘭芷盡欄十二君山青
北渚南汀礙眸子蒼茫杳靄一千里鬼誕仙妖似湖水

纖阿浴菟出西涯飛上南翁棹歌裡

遺芳蔓

武帝思李夫人卧延涼殿夢夫人遺帝
薜蘿之香覺而衣枕香三月不歇帝因

製曲名遺芳蔓又
賦落葉哀蟬曲

龜屏象簟塵凝輝桂枝落盡秋氣悽瓊瑤臺上魂是非
孤鸞照影心含悲離宮別館春茫茫延涼殿上空情傷
却憑鍾火一莖草換得薜蘿三月香蘭風蕙露怨嬌盡
落葉哀蟬關鳴嘶嚶嚶語誰得知再取玉簪搔素絲

五月寒

延祐丙辰夏江南久雨甚寒

朱明避事秋萬里葛潯羅塵索裘綺赤帝藏龍天漏水
白鳥蒼蠅凍縮甯五月雨聲長在耳有虞皇帝拂瑤徽
濕透縻絲彈不起招搖下望白玉京朝天蒼珮寒無晶
馬毛拳帽坊門閉閒却金盤不賜冰

洗車雨

每七夕有雨俗謂天帝為織女洗車

一從去歲閑油壁塵暗香輶有誰拭瓊娥玉腰莫遲回
為我飛書呼軫畢雄雷雌電傾河來寶輪濯濯無纖埃
桂香陌上不泥濘虛無指點迴蓬萊烏橋銀浦沾濡徹

鳳靴鸞鞭潔如雪猶恐黃姑淨病深更擘濕雲填古轍
北中寒

燭龍吹冷元冥唾雞子庖從沙闕過羲和呵手馭日車

噤瘁陽烏三足墮驪山溫泉徹底冰白地裂文如旱塍
窮陰凍合黃鐘琯緹室葭灰不得升射麋將軍守糧屋
霜結虬須懸麗晷琵琶弦折酒成澌風刀剗破雙顴肉
榮華樂

大明飛光白玉堂花樓網戶騰春香鳴鐘饌玉雲母床

堂堂夫壻侍中郎青雲捧車謁漢皇公卿夾轂趨道傍

董賢朝朝

音眠

未央將軍夜穿蹋鞠場柏梁置酒詩成

章黃金駟馬來徜徉起山引泉大宅張蘭湯洒屏鳴笙

簧女娥窈窕聲遠梁迴風飛雪衣飄颻芳年華月溫柔

鄉流蘇斗帳垂珠璫紅麝麝枕辟克殃紫金釵梁懸鳳

皇階前七十二鴛鴦綺檐羅列生輝光平頭奴子跽擎

觴酒酣調笑邯鄲倡腰橫半鮮金蛇黃玉池芙蓉簾外

霜關符如火

關

黃門開將趨宮漏長扶來丹地拜天

子願沐鴻休亘終始

同年程時叔內翰還浙東

玉堂松柏高蕭森老子時時莊鳥吟久矣京衢厭塵土
茲焉海浦覓園林西清供事有佳興南浦獨返無留心
著書藏稿名山遠讀易探著理窟深春流沄沄敗冰暖
晝日曠曠高天陰離情竟作一發箭交道終期百鍊金
衆賓懷抱付盃酒二子德色墮衣襟人生會合有天命

闕

商參

張武定戰死西南夷

邛竹蒟醬啟邊釁犀甲吳戈成國殤風悲戰鼓慘欲死
日曠戰雲寒不光黷武可憐棄軀命討罪宜用施威強
內符近遣滇海將傳說英聲皆激昂

趙存誠除曲江縣尹將上枉道還長沙為乃父
平遠公焚黃

曲江大夫故家子白髮蕭騷辭帝里官居嶺表不即上
路指湘中有餘喜乃翁勲業聞紫庭手捧芝書新易名

祥光一夕照宰木芳銜千古榮佳城椎牛上冢歡聲重
石獸無情亦飛動莫怨神道少豐碑聞說新除好祖奉
踈齋已志墓
神道碑未有

九日再會飲如舟亭分韻得異字約賦廿句

周郎家本住武漢入京暫作公府吏閉門哦詩常撫卷
倒屣迎賓能好事今年中秋偶晴明好友持杯恰三四
時當九日復讌集瀟灑軒楹臨水次檻華錯粲隣舍移
壺醞氤氲內官賜天高氣清萸菊節攬袂奮髮湖海士

風塵悠悠渺芳躅觴咏蘭亭或堪似人生行樂適意爾
局促轅駒老將至酣歌慷慨時自新放達何須較愚智
媿無硬語出磊砢追逐盧仝並馬異

永豐曾明善秀才挽詩

三十未有二十強清門士子堪悲傷讀書矻矻窮晝夜
弄筆徃徃多篇章世人謾歌蒿里曲地下應作修文郎
君不見江城南有客不識字華纓紫綬鬚如霜

宇文子誠出掾河南行省二十韻

至順元年十月初故人舍我將南徙君喜迎親去志速
我慘送君離思起西山雪小陽烏逝北口風高喬木死
吉貝衣消京國塵木蘭舟泝漳河水夷門舊交兄弟若
吳房老父咫尺爾人生百年貴適意戚促何須羨金紫
憶我前年在灤陽千里兵塵四郊壘妻子哀號不得見
乘駝歸來溷悲喜彤庭捧牘負長材烏府珥筆存舊履
磊落不作風塵態宇宙茫茫少知己與君同朝三四年
清苦何嘗設醪醴歲時相見徒勞問我爾俱貧情曷已

江陵古城多北客我昔與君共閭里君年三十八公府
我髮漆黑政童子邇來蹤跡各星散南北東西困泥滓
王城會面忽驚電君踰知命我強仕微軀潦倒屬名疆
半世蕭條鮮生理重內輕外古所云媿我謀身敢如此
鳩巢未葺政坐拙菟裘將營何所指因君之行重太息
搔首蒼茫對斜晷

送周子嘉由長秋寺令史出為滁之來安簿輅
迴武陵覲省二十五韻

周郎十五二十時皎如玉樹階庭芝出門掉臂不揖客
操觚作賦猶從師龍駒未騰掣電足松羔早挺凌霜姿
自憐渠儂似明鏡目我儻父為鈍椎論文忽經十寒暑
聚首遂作雙塤篋君留我別迹相遠離羣索居情不怡
流萍適楚復南邁行李趨燕同北馳桑弧蓬矢負夙志
爺孃妻子成遠離黃鶴樓前暑云徂文明門內秋為期
風塵南陌困英銳痴僮羸馬淹孤羈太學諸生曳青衿
長秋小史稱白眉延春閣下晝脩牘崇恩寺中朝侍祠

往來灤京堂適庭召集閣寺鐵就磁出祖春醉葡萄館
勞還秋宴白蓮池詞林舊交賞清俊公府餘暇陪遨嬉
河濱亭子九日酒座中華筆十韻詩吏役免譴獲書滿
選曹擬官惟據資米珠薪桂脫艱阻青袍文笏將設施
快如海鵬始奮翼逸如天馬初釋羈親庭何勞賦陟岵
子舍那復譌戾戾祇知定省當汲汲奚較赴上猶遲遲
華裾綵繡別良久大編我寄載小姬策名仕版副君願
賦詩河梁勞我思長安落葉路不見洞庭寒波風亂吹

若到來安將舉職莫忘武陵初解維

歐陽原功由藝文少監謁告歸瀏陽

七年不見荼蘼花湘南學士思還家
賣馬徑出藝文監買船便赴潞河沙
始隨徵書官壁水北門風月清談爾
兵塵荏苒居庸闕襖被蕭條教忠里
奎章閣上進成書九重知是尹蕪湖
腰帶黃金佩蒼王玉卮賜酒榻前趨
君恩如海誰能報回首鄉關動懷抱
尚平昏嫁幾時畢陶令田園何日到
槐舒菟目柳如綿浩然歸興南風前

閨人含笑僕夫喜那顧悲歡各異緣西山過雨離筵曉
川途萬里雲繚繞里閨逢迎樽俎歡都城會合簪纓少
徐延壽母張節孝

時徐將赴順德任縣尹

良人旅櫬藏故鄉襁中孤兒佩銅章善事尊章不歸寧
叶藁砧泉下無遺恨棹楔門前有耿光

廬江縣尹俞器之妻羅恭人節行

羅漢臣學士之女

廬江生前事箴組廬江身後主門戶疾時和藥死廬墓
刲肌斷髮事可舉廬江無子誰與處鸞誥騰光照鄉土

其憐令尹得貞妻不道翰林生淑女

金陳州同知孫德政妻高氏貞節

一子名潤孫五人高氏卒

年八十八

三十良人如冠玉領兵當關

於

死不復燕趙年饑盜賊

窟攜兒避難聚族鸞鏡塵昏忘膏沐舍飴弄孫備五

福巍巍雙桓表門屋祀妻謾作崩城哭

德政卒於至大年間潤始七歲

高氏旌門於延祐年

潘陽胡茂卿善餘堂

茂卿嘗作此堂奉其父叔嘉今年七十子五人

老人種善如種田三世力耕無歉年賢為鑑基義為耒
芝蘭玉樹嘉禾然菑畲有術誰能傳沃不以糞激匪泉
井底白金五千兩甕中青錢三百緡嘗有人避難以白
金五千兩寄茂卿
後全付之其人分半以謝茂卿不受又或人負他人債
質不能償徵者甚急將棄其母溺水茂卿見之與俱還
出其家甕中贏餘之錢得三百緡遂以二百緡
償逋一百奉其母其人問姓名茂卿不肯告

慶元葉謙甫挽詩

維南一士美如玉懷才制行遯空谷子孫誥誥宜厚福
青衿十年易章服翔鳳原頭可瞑目

蘇伯脩右司滋溪書堂

滋溪溪水清如玉堂中藏書高似屋綃縹裝潢芸葉馥
遠過李侯三萬軸上世遺安重教督有美令孫克佩服
移書度几置書腹用之經濟且啟沃尊經續史雅志篤
屈宋衙官騷則僕堂前山水秀且綠堂中之書茲不屑
愧我四十鬢欲禿文學事功俱鹿鹿悲歡枯落悔不足
欲登君堂借書讀

行路歎書利陽驛壁

冬雨撲面朝不寒驅馬馳逐荆門山麥隴高平稻塍直
竹樹雞豚山兩間少年筆硯為生理耕得虛名纔半紙
道逢良田勝境如麴車老我流涎何日止

李時進僉憲持其考君墓表求詩

受封襄垣縣男

襄垣老人志不羣教子岌岌興高門燕山諫議有陰德
陳氏省華多子孫少年孤貧嗟素身策名仕版期後昆
報施之道昭而神著布文象龜灼文老人種善如種樹
老人視財如視土紫衣綵衣事尊俎恩封鄉縣爵第五

七袞告終既壽考叶螭首龜趺賁泉戶君不見草間無

聞亂冢何足數却是當時守錢虜

趙侯髮白返黑

後衛千戶致仕年八十八更前
衛時王千戶殺西相至今能談

其事

日中則昃百川東之不西流將軍鬚髮白返黑身強
能使元氣周禁軍前衛皆從事少壯馳驅老來貴幕中
文字羽檄飛腰間符節龍章佩功名遂樂天年矍鑠
何須羨馬援述舊能談鐵鉞將奕棋常對爛柯仙只今

行年垂九十鬢變青絲髮點漆高堂明鏡莫空悲學取
將軍養生術

中興萬戶愛假山築亭號粹峯亭

元戎生長太平世雨甲苔槍日無事築亭排石示燕閒
比似南塘更清致煙霏晦靄羣峰巒莎陰蘚豐相迴環
天台廬阜入胷次華陽艮岳非塵寰米狂呼兄名不朽
千古高情能尚友我知主人愛山符節然傳付子孫俱
世守

柴舜元玄雲石

重陰蔽天濃似墨疾風碎剪不盈尺累累靄靄亂拋擲
肖像凝神作奇石松窓竹塢玉立之仙霧為幄煙為衣
米狂拜罷捉不住清潤一卷愁欲飛長安才子惜如寶
袖中攜置夷門道當時不見萬態峰只今空望三山島
吉安劉楚奇祕書浮雲道院

桑弧蓬矢男子志溟鯤鼓鬣鵬張翅揭天勲業固垂名
擇地園林須適意夫君家住白鷺洲先世田廬不外求

宗親同居三百歲卉木素封千戶侯桃花源裡山川麗
輞口莊前亭館邃兒孫祇解弦誦聲泉石更無塵土氣
邇來矯首蓬萊山凌風珂珮聲珊珊蕭然三徑兀自若
夢寐衡門時往還賢豪心事人不識進退卷舒那可必
君不見太平宰相三十餘千駟萬鍾成棄擲

燕石集卷三

欽定四庫全書

燕石集卷四

元 宋聚 撰

雜言

太白酒樓

延祐己未初自江南還京途經濟州所作

我昔在髫年知有謫仙人少壯讀所作天才氣凌雲潯
陽紫極宮往歲聞佳句采石青山頭前月拜荒墓夜宿
簷下雲秋弄江上月何如任城樓狂飲興豪發況有任
城宰具酒復知音酒酣臨八極世事徒駸駸內子香閨

夢伯禽嬌且啼人間火宅謾煎逼政是玉山傾倒時散
披紫綺裘倒著白接羅銀臺金馬直一唾方瀛絳闕行
將去仙之酒杯失遺基樓觀雄垣表暗題咏石榴海栢
森西東謫仙人今何在汶水鳧山黯蒼靄手揮玉鞭騎
玉鯨應在浮雲九州外仙人魂魄茫氛氲望之不見矧
可親明朝我至玉京去願謁蓬仙賀季真

三五七言

樂亭縣作

寒空高寒鴈號霜氣嚴征柝風威薄錦袍一夜相思心

似海荒城四望愈怵怵

塵泥歎

至元元年乙亥七月久雨後

經涂九軌壯王國歧蹊委巷錯綜若緯織殭車石馬匹
億旦旦躡轆化作深土深數尺汙人衣冠垢人髮膚飄
簸蕩穿入墮清几席令人生憎心內熱氣鬱悒豐隆裂
缺怒赫赫天雨下土痛濯滌漲空埃壒淨無蹟洒然頓
覺醒胃臆誰謂滿天霖霖數十日塵固無復作崇泥淖
乃爾亦可疾輿陷三十輻驕馬至不能援其膝壯夫徒

行循墻僅才于弱婦孺子悉魚貫困躓七月中氣處暑
畢陰雲未徹霽未必小夫賤隸又恐風高日出塵復作
輾轉皇惑計無所出我為呼天勅鬼工運甃或伐石甃
疊平安妥泥少塵亦息

送翰林編脩成誼叔驛召魯子翬學士於鄧遂
便覲省成由國子生鄉舉於大都至順四年
登科今始得歸鄉里

盛時寰區奠金甌四方才子紛來遊郭隗臺荒登不得

李膺門下久難留南陽年少詣闕下氣如鵬鶚文如彪
長松聳壑被斲削大玉作器辭琇瓊既不能上書謁宰
相又不能投刺干王侯獨抱獲麟經如信渭濱鈎鼓篋
橋門不盈歲奪標桂苑僅經秋挽彊一中楊葉遠不識
楚人三刖愁落落拾地芥肯貽鄉邦羞錚錚破天荒迺
在帝王州泥金帖子附家信上報里中父老驚倒同門
儔玉堂載筆事方始北堂戲彩心難酬書藏石室報天
子遂我拜母三年謀薊門一昔歸心起夢裡阿嬈驚且

喜驛樓佳樹拂狨韉詞館新篇盈蠟紙家園風景有如此
關吏歡迎棄繻子疾趨慈榻笑稱觴次謁鄉賢忙倒屣
浮雲暫蔽奎躔爾須信斯文難隊地招邀郊藪鳳麟來
菊花潭上從君始西南歸路平如砥太行山色青如洗
我幸君歸且怨別心逐太行山色送君直過黃河水
奎章閣學士院照磨林彥廣代祀嶽鎮海瀆以
詩送之

天子代天理萬物輔相治明神治幽贊佐化育兩交盡

始得物無疵癘年有秋神有貍沈牲幣封爵位號祈報
古典禮人則公侯卿相秩祿寵數尊且優廟堂變理未
始有乖戾無乃神失職遂使燕趙旱暵吳越餓莩盈田
疇九重宵旰念民命慎簡清直乘軒輶分詣諸神祠焚
玉塵至馳突不少留恒嶽奠畿輔濟瀆河內為上流矯
首東南行徑指會稽秦望遊衣冠榮庭陞珂珮鏘琳瑯
椒漿桂酒感肸蠁竹籩木豆羅脯鱠焚香早致辭盥手
屢叩頭潤澤善利責望水興雲作雨嘒嘒燥濕申命林

麓原隰諸林丘我知山靈川后今歲效職致豐稔不負
天子聖慮貽我使者羞

古樂府

追和何謝銅雀臺妓

寒露泣丘草悲風漳水聲黃腸定何許歌吹徒營營總
帳守明月佳人情不勝眠中不得近痴絕望西陵

秋絃怨

海風吹涼薄璇宇桂壓鉤欄秋作主銀灣凝月澹游溶

雲彩粼粼騫鳳羽王帳懸沙塞夢寒沙淚啼秋山迸泉
哀蛩不解論心素金字空侯挑夜弦大漠沙如雲去京
三萬里弦聲隔秦城無路入君耳七星西橫露漫漫金
刀剪衣丁夜眠他日賜金高似屋嫖姚應是關嬋媛

漢宮怨

趙飛燕漢春如一日色映豹尾竿膏香髮鬟漆掃粉浴
蘭雲帳底三十六宮寒似水天教痴妬擅浮榮綠篋緘
傳還啄矢唯餘擁背人暖夢黃金殿西風長信深塵埋

舊紉扇

兩頭纖纖

兩頭纖纖豪矢髻半白半黑月蝕空膈膈膊膊叩頭蟲
磊磊落落真英雄

兩頭纖纖針背魚半白半黑蠟紙書膈膈膊膊雨跳珠
磊磊落落戴石硯

五雜組

五雜組蟬螳掣往復還寒暑節不獲已新昏別

五雜組眼纈眩徃復還烏衣燕不獲已沙場戰
五雜組褱翟衣徃復還大明輝不獲已妻兒饑

戰城南

天曆元年秋

戰城南戰城北前軍失利勢日迫敵兵過谷曠騎據水
相搃乘間格鬪日薄西陲大車傳餐且噍且戰彼竈不
得晨炊伯兄刺弱小弟父子對射泣涕洒馬踐渠荅行
仆躓劍鋒刺落左辮腦骨披厚陳雲霧斂烏烏四面集
高天厚地哀我身死名不立奏凱第功賞持書論首級

皇帝陛下聖壽千萬歲掩骼埋胔告郡邑

擬古辭寡婦歎

弱質生良家幼歲聽傳姆訓戒言聞有三從夙夜居常
惕然及年適夫子自意偕老死歸黃泉上戴蒼蒼之天
下有我履之厚地竟不醺我願為婦未十載夫子忽舍
我去魂魄不復還尊嫜哭其兒且哀我少寡居涕泗恒
漣漣我哀曷已恐重傷堂上心茹恨恐死強自寬撫育
三四孤紡織治生供衣服粥饘教養幸成人奉夫子祀

事以樹立家門上奉尊嫜甘旨不敢少怠猶夫子生前
華飾不復施衿擗纓佩置之埃塵有耳不敢聞梱外事
律已逾於未嫁先自分為待命未亡人禮法自防豈敢
愆猶復小郎口語譊譊姻族攜撫相熬煎哀哀欲誰訴
祇苦心內割裂欲死無緣賴是縣官旌宅里里中稱孝
且賢少白我心瞑目無所怨許曰已矣乎薄軀奚術求
全願言禱大司命生世莫作婦人即復作婦人願死在
墓礎前

流黃引

桂庭月午啼蜚間鸞宮露下水紈單
燈毳帳鴈門塞妾心料此中閨寒
流黃縮澀微含潤錦石鋪雲瑩相
襯細腰杵急夜如年搗碎商飈不知
困春纖易製添光澤鳳花入眼波紋
溢東天皜皜呼侍兒快取衣箱金粟
尺

竹枝歌三首

洞庭舟中賦時至治二年二月

正月二月不曾晴
縈蕪洲邊春水生
黃陵女兒年紀小
學唱竹枝三四聲

菜花一尺籬門開
栗留聲斷斑鳩來
舍南青苗沒人插
郎在黔中何日迴

東山日赤雲氣昏
河姑勸我莫出門
持筐採得桑葉滿
直到阻雨溪南村

又二首

自遵化縣還京途中作至治三年春

五里河邊修禊時
犢車載得細君歸
河邊柳色迎草色
山雲結雨行人稀

野春平碧生暖烟
虹

去聲

橋南畔沙漫天潞陽河上見酒

旆直下復有釣魚船

虹橋在通州河東三十里

又三首

送余德輝還池州

春城客子酒著顏
迢迢秋浦是鄉關
江風海月棹歌去
南尋李白何日還

沙渚青青芳草茁
梅根潮落蒲帆發
江頭少婦卜金錢
行人歸來有華髮

江東酒船可拍浮
江東女兒嬌且羞
況復春江花月夜
吳儂還向箇中留

又四首

送安慶教授朱仁卿

城南城北雪不消城門道東無柳條我儂相別無可贈
學取楚語作歌謠

淮河岸頭春草生淮河舟中客子行春江花月權歌發
吳儂伴我過清明

南是長江北是淮中間獨坐吟高齋有書不報朝貴客
有夢不憶長安街

往年泛舟揚使旌七月八月江水清秋江亭上好風月

莫怪我儂忘寄聲

泰定二年秋予使過郡幕府李廷玉留宴于秋江亭明日始發李今仍為

郡寓公

又六首

自溫州抵處州途中作

江南十月如春暉不知北土霜霰霏攬嶼亭前橙薦酒
瑤闕嶺上汗沾衣

容城洞口朝雨霏江心寺下早潮迴永嘉山水自好在
永嘉過客不重來

此去京城五千里川途修阻萬山我好山好水且消遣

欲說離愁將奈何

思遠樓前罷登眺
華蓋峰下好吟哦
東甌舟子趁潮去
棹謳不似竹枝歌

山頭小雨雲如衣
山下白烟是闕炊
永嘉上流無驛路
永嘉舟中宜賦詩

石如鶩卵水如玉
安溪闕戈清有餘
我儂舟中多樂事

坐闕看闕

楊柳詞

齊化門東馳道上
鶯黃閃色弄新陽
憑誰移向龍池種
搖曳宮花撲面香

又六首

通州道中作至元四年春

第一鶯黃映曉烟
梢長娘娜弄暄妍
待得濃陰滿夏日
不如春月取人憐

夾道青青到鳳城
一般飛絮兩般情
離筵見處泣相送
歸鞍撲著喜相迎

玉泉山下綠絲垂
曾見先皇駐蹕時
翠輦金輿何處去

烟條露葉不勝悲

金鞍曉拂枝頭露珠帽晴沾苑內塵古來每見人悲樹
如今却見樹悲人

齊化門東醉別時主人折贈最高枝船開酒醒潞河遠
回頭烟樹漫參差

北客還鄉二十年來時楊柳故堪憐而今張緒生華髮
手弄柔條一惘然

輓轡曲

金匱要略卷四
漢月轉桐枝羅衣怯嫩颼銀瓶輕墜放鷺散乳鴉兒

綠水曲

妾家若耶溪門扉綠水西桂月破烟暝波明楓影低潮
痕暗沙觜浦影空雲飛蘋洲風未起待妾採蓮歸

垂楊曲

唐體和張仲容

杏花雨小西曛出紅鴛微步芳溪曲垂楊樹暗粉牆高
却上晴樓窺宋玉檀奴不到心茫茫春波一眼無鴛鴦
採花蝶子不解事雙飛直到簾旌傍含嬌倚困愁如許

捧硯輕綃識眉宇柔情書滿紫霞賤教與雕簷綠鸚鵡

春城曲

和馬伯庸

孟陽冉冉青年度樂酒踏歌寧計數魏花如斗雲光紅
揚鑣迤邐城南路門前佩馬春泥聲香闌鎖暗銀杯傾
可是卓姬能竊去梁園司馬擅才名

楊花曲

宮鶯百啭花房委燕子日長三月尾玳瑁鉤簾後閣空
殘絲拂度銀塘水白袷春衫俠少年旌旗別恨相縈牽

盧家小娘不閉戶低回交舞粧臺前
輒風吹香嬌脈脈
西園塢徑東園陌雲蹤雨跡香難憑
身年誤殺金釵客

殘春曲

三月初盡四月始天氣無常每如此
雲垂乍占雨脚近
日麗倏驚風勢起宮槐蓊鬱花如洗
南園悵悵淨如水
公子王孫醉不歸酒醒一昔芳心死
繁華去矣餘塵埃
愁來不飲空持杯歌筵蝶粉頻稀少
賓館柳絮猶徘徊
少年但知恣歡賞不道天時有來往
青軒無計駐芳菲

赤帝多情催長養

河淮曲

送桃源縣令簡西碧

河水濁淮水清中央置縣樹孤城縣中置令司羣氓官
尊無差遣俗善少鬪爭令果仁賢嚴且明能令民衣食
餘饒雞犬不驚恩澤旁浹垂令名圭田租入足代耕鮮
醲飫妻孥饋遺及友生何必黃塵赤日飄纓紆組趨神
京乃始得稱豪英嗚呼簡君官甚美我歌送行不飢散
願君莫學河水學淮水

杏蠟辭

和馬伯庸泰定元年作時初忝科第

霞綃簇春笑紅雨曲江芳情惱遊子郎君焰光高二丈
燒殺杏花三十里觴酣小駐龐姨家鶯歌溜玉鏗紅牙
華裾飄麝鬢毫綠上馬行陪擇婿車

乞巧辭二章

京師里俗以七月七日昏時設祠乞巧於天星織女蓋閨人處子惑

於荒謬怪誕之說不事箴組覲倖渺茫虛無
之效卒無所得予聞其愚遂設為婦禱神答
之意綴成此章假辭託興以譬夫世之學者
昧下學上達之理忽畧遺棄於日用尋常之
事而謂聖人之道高遠玄妙非力行之所可
企及當求之于恍惚有無之域是以終於無

聞漫不知省因以
為戒且自警云爾

若有人兮炫服嫋容稟慧淑兮思擅女紅邈天媛兮揚
靈資禱祠兮或通明月兮為宮瓊筵兮名供餼饘兮桂
醕蕙炷兮蘭缸紛娣姪兮翺翻儼竦息兮敬恭晞明明
兮嘉惠感欸懇兮弱衷抒絕藝兮告予啟下妾兮昏蒙
竢胎蠻兮闕極勞心兮忡忡

若有人兮天渚廓憑虛兮容與長襦結兮雲衣鏘琳瑯
兮珩璫擢翠旌兮前導召星妃兮為侶肅冷風兮高馳

指藥房兮來下哀要眇兮闇昧恍冥冥兮晤語曰婦職
兮實人為懋勗勞兮事纂組諒紉針兮製作將剖毫兮
析縷祇乞靈兮詭秘羌遺誚兮鹵莽女怙悵兮太息渺
神君兮遐舉

彭宗建思親堂辭

羌吾有身兮恩孰厚於親兮愛日竭力志猶未信兮生
事不及思之極天兮思兮思兮豈徒勞吾神兮不愧不
辱貽令名於不泯兮孝子錫類推吾仁兮評語德色尚

人其人兮

延平葉將軍歌

葉名衡字仲輿

鷗鵲膏兮兩刃明
筍簾索箭雙帶輕
將軍意氣紫電騰
竹函龍節關中行
叢巢舊柵妖氛死
歐狗餘氛淨如洗
綵幅纏跽事耕耒
牲酒晝歡門夜啟
有時整隊搜林樾
雞狗不驚笳鼓懸
刀解箭燒紅帟倚
帳酣吟刺桐月

歐狗至元間福建劇盜黨與甚衆
故平章徐國公徹里討平之

天台道人歌

贈項子虛

天台道人住幽燕相知垂及二十年黃冠羽衣固不與
衆異心脾一片常若冰雪之灑然瞳子點漆黑兩頰朝
霞鮮不知世有熊經鳥伸吐納鍊攝之祕訣方寸坦坦
泓渟淵閭閭府署得失已不掛齒頰煉丹蛻骨又不形
語言不曲意諧俗而俗自喜不超然逃名而名自賢不
為壺公左慈之幻眩不為祀竈却老之誕謾病者相謁
徑走馬往救不屑屑責報歸來燕坐高槐軒藝精時猶
閉戶究難素客至大叫拍案治具傾玉船共談南土風

物輒歡笑京衢風沙暑雨亦復不厭能留連我為道人
寫真已太逼何用縑素施丹鉛他年史筆不傳方士傳
方技歷歷為我徵長篇


知足齋歌

東海蔡平甫未七十致仕以知足名
齋其子升卿與予為同舍生江陵郡

庠

人生堪與渺海粟心為形役太愁顚歲衣十匹適燠寒
日飯兩盂充餒腹口體之奉蓋養生蠅營狗苟復功名
軒裳茵鼎遂雅志白頭皴面無歡情四十不作尚書郎

倏忽頭顱已如此淵明那嘆松徑荒季鷹豈謂尊鱸美
蔡侯靜者吾故人老聃名言書諸紳向持白簡肅江漢
今祇牙緋耀里隣幅巾藜杖書連屋孫子田園多厚福
久知薄酒勝茶湯尤惡得隴復望蜀五陵紈袴爭紛華
掠剩鬼瞰高明家旂常竹帛渺何許雲陽市上令人嗟
左手持肴右持酒酒酣起舞歌擊缶采衣照映酡顏紅
不識門前斷腸柳粉榆鄉社安樂窩靈臺瑩澈恬無波
烟水雲山動高興玉堂金馬奈予何



燕石集卷四